

## SAN PABLO KARTA TITO JÏI

### *Pablo' Tito's fxi'jni*

<sup>1</sup> Adxa' Dxusna selpisáa Pablo yaaseth, Jesukristo jxkaahnisa. Txãasa Jesukristo tasxte nuypa'jwa'jsath Dxus txhitxnisa ũstxna txãawe'stxxi, kxah txãawe'sxwa Dxus yuwe isasa's jiyutxna, <sup>2</sup> bagaçxte yuhwa pçumée ĩtxi fxi'zewa'ja's ji'phuya' sũhna. Txãa pçumée ĩtxi fxi'zewa'ja's Dxusa' peesya' neeyũuk Dxus ĩsxiisamée naa kiwe meetey. <sup>3</sup> Txãasak txãa pçumée ĩtxi fxi'zewa'ja's en ähte', kaajiyu'j kwe'stxxi nwe'wesa Dxusa' adxna pta'sxwa'jsa nvxihtçxa. <sup>4</sup> Naa karta's fxi'jaçthu Tito adx nçxi'k na'wēsag naa pa'ga. Txãasa e'zsay txãa na'wēçxaçxáa Dxusa's jiiisatha'w. Dxus kwe'sx Tata vxite' kwe'stxxi nwe'wesa Jesukristo txãawe'sx peeygãhçxa pu'çxte', idxa' ewçxáa wēt fxi'zene'ga.

### *Kreta kiwete Tito mjĩini*

<sup>5</sup> Mar pxãhte Kreta kiwete idxa's nvxihtthu adx ma'wē neewe'weni's kxtey yuukahn. Txãa pa'gag idxa' kxtee yuwe puutx we'wena jxã'jnimée neeyũuk txãatx pheu'jna jxã'jçxa çxhab iisa dxuus yatte jxkaahwa'jsa ancianowe'sx pakweçxa ki'pna yuuwa'jsa neeyũu. <sup>6</sup> Anciano neeyũuwa'jsa' wala ew fxi'zesa yuutxna jxpubate yu'kxpehni yuuya'mée. Sa' peekx nyuu yakhçxáa

fxi'zesa yuuwa'ja'. Aça' txãawe'sx luuçxa' Dxusa's nwēese'jsa yuuwa'ja', txã'wē Dxusa's nwēese'jmée ewmeetx yūuna fxi'ze' jñi yuuya'mée. <sup>7</sup> Dxuus yatte jxkaahwa'ja's jxpa'gasa' Dxus mjīia's thegwa'jsata', txãa pa'ga wala ew fxi'zewa'j ji'phta'. Vxitetx ūusçxa we'wena juuna' thegna fxi'zewa'jme'. Tūuna, puii jxpakwena, vxyuuçxá's yajkçxa mjīiwa'jme'. <sup>8</sup> Txã'wē yūumée, ew yūuwa'jçxá's yajkxna fxi'zewa'ja', pa'jsatx yat pki'jna, ew ūus yajkçxa we'wesa, Dxus dxi'pte ew fxi'zesa, Dxus yuuçxá's selpisáa, ma'wē fxi'zewa'ja'swa peekíi wala jxpa'yakxwa'ja'. <sup>9</sup> Dxus yuwe isasa pta'sxni yuuk txãate yuuçxáa txutemée fxi'zewa'ja', vxite jxpubasatx ewsa's kaapiya'jna kçxhãaçxha'jya', sa' Dxus yuwe isasa's açewe'wesatxwa ew kaajiyu'jya'.

<sup>10</sup> Txã'wēme', Dxusa's açesa seena' wala ūsta', selpimeesaçxá's we'wena nasatx kaypuba'jna. Nawa judiuwe'sx wejx thaakwe txã'wē yūuna ūsta'. <sup>11</sup> Txãawe'sx ĩsxiini yuwe's jxukate kwe'we'jmée yuumeete', yat iisa jxuka kaypuba'jna ūsta' ewmeesaçxá's kaapiya'jna vxyuu knaywa'jçxá's yajkçxa.

<sup>12</sup> Txajíik teeçx wala jxtuhthesa kxteewe'sx txajx nwe'sxiçxáatx na'jñina we'we: Kretawe'sxa' wala ĩsxihta', weesweesata', watxkuē nū'saçxáata' jñinak fxi'j'. <sup>13</sup> Txã' isa yuh we'wek. Txãa pa'ga txãawe'sxtxi' juuna' mwe'we, kxah Dxus yakh jxpubamée jweeíçxáa çxhãçxhana u'jçxa, <sup>14</sup> judiuwe'sx ĩsxiina kwentu'jni's nwēese'jmeetxna, sa' Dxus tasxuh txuteeçxa

fxi'zesa jxkaahnitxwa nwēese'jmeetxna.

<sup>15</sup> Maawa ũuste ewsa's ji'phsa', ew yaakxwa'j yuuçxá'sku ji'phu'. Nawa maawa ũuste ewsa's ji'phmeesa', ewmeesa yuuçxá'sku yajkxna fxi'ze', txã pa'gatey txãawe'sx ũus yuu jxuka ewmeena naa pa'ga. <sup>16</sup> Dxusa's jiitha'w jĩ'tx, nawa Dxusa's jiisa na'wē yu' fxi'ze'çmeeta', naasáa seena' kazxsaçxáata', Dxusna ahçena kīhwa ewsa yu'sa' kaavxya'ja'jya' ājasameeta'.

## 2

*Dxus yuwe ma'wē jxkaathe' txã'sçxáana kaapiya'jwa'ja'*

<sup>1</sup> Nawa idxa' Dxus yuwe ma'wē jxkaathe', txã'wēyçxáa kaapiya'jna mes. <sup>2</sup> Txã'wēme' piçthē'j thē'jsawe'sxa' kīhtewa jxuka jxpa'yakx fxi'zewa'ja's piyawa'j ji'phta', kīhsuwa kxtey yuuna, ũus yajkxçxa jxpa'yakx we'wena, Dxus yuuçxá's ũusuh jxuka yajkxna, peeygāawa'ja's peçxkanamée, makwe thēysa pa'thewa txāatxi' nxusmée fxi'zena txã'wē piyawa'j ji'phta'. <sup>3</sup> Txã'wēy u'y thē'jsawe'sxwa peekí wala jxpa'yakx zhiçxkwe fxi'zewa'j ji'phta'. Isameesaçxá's wēse'jçxa nuywe'wena fxi'zemée, tūunawa fxi'zewa'jsameeta', ewsaçxá's kaapiya'jna fxi'zewa'jsata'. <sup>4</sup> Kxah kna'sa u'se iimi'sawa txãawe'sx nmi'tx peeygāhna fxi'zeya' piyaatxna, txã'wēy peekx luuçxtxi peeygāhna, <sup>5</sup> peekí wala jxpa'yakx kīhtewa jxuka ewçxáa fxi'zena, txã'wēy yattewa jxpa'yakx fxi'zena peekx nmi'tx nwēese'jna, kxah kim yuhwa Dxus yuwe's açewe'wemeetxna.

<sup>6</sup> Txã'wëy piçtakxwe'stxiwa myu'kxpeh ew zhiçxkwe fxi'zekahn. <sup>7</sup> Sa' kîhtewa jxuka idxa' ew mfxi'ze, kxah txãawe'sxwa iidx fxi'zeni's uyçxa', txã'wëy yūukahn. Kaapiya'jni'swa le'çxkwe yuhwa fxiymée jxuka isasa yuuçxá's mpeeta'sx. <sup>8</sup> Ew yuuçxáa yu'kxpehna mfxi'ze, kxah kim yuhwa i'kwe'stxxi açesa ewmée nuywe'wewa'ja's uymeeçxa', thaameetxna.

<sup>9</sup> Selpisaatzwa myu'kxpeh, txãawe'sx patron jxkaahnitx kîhtewa jxuka nwëese'jna wa'lna ũusçxa pasmée ewçxáa yuukahn, <sup>10</sup> kîh yuhnawa pesweemée ew yuuçxáa fxi'zekahn, kxah txãawe'sx ew fxi'zeni's uyçxa', nwe'wesa Dxus yuwe' wala zhiçxkwesa yu'ga jînaçxáa we'wetxna.

<sup>11</sup> Dxusa' txajx peeygãani's kaavxya'ja'kh txã' maatxwa jxuka ewte nvxiitwa'jsa'. <sup>12</sup> Dxus peeygãani' ewmeesa's nvxihtna naa kiwete pkalte fxi'zewa'jçxá's yaakxni'swa nvxihtçxa, peekíi wala jxpayakx fxi'zena Dxus yakh tx-utemée txã's yuuçxáa selpiina fxi'zewa'ja'sku jxkaaja'. <sup>13</sup> Txã'wëy Dxus peeygãani' kwe'stxxi nwe'wesa Dxus Jesukristo jxtuhthesa kîjxa' neeyūuk txãa en āhpkaçx weçxana ũythasna ũswa'ja'sku jxkaaja'. <sup>14</sup> Txãa Jesukristo' kîh ewmeejūwa kwe'stxxi nwe'weçxa jxuka pkaltxi yaateçxa jxukate txãa jîi vxit-ya' kwe'sx pa'gate uuk. Ewsa yuuçxá's jxuka kxtey yuu jxthãasçxak txã'wë yūu.

<sup>15</sup> Txã'wë yūuwa'ja's kaapiya'jwa'j ji'phgu, kîh yūuwa'ja'swa ũukhmée kçxhãaçxha'jna, ewmée yūukahmén yu'kxpehna. Idxa's kim yuhwa ahçena weeçxwa'j ji'phmeeta'.

## 3

*Dxus yakh fxi'zesawe'sxa' khuẽswe'sxtxi  
nwẽese'jwa'j ji'phta'*

<sup>1</sup> Yakhthẽ'jwe'sxtxi ki' mkaayaki'j maawa jxkaahsawe'sxtxi nwẽese'jna, khuẽswe'sxtxiwa jxuka nwẽese'jna kĩhwa ew yũuwa'j yu'sa' jxuka kxtey yuukahn. <sup>2</sup> Kim yuhtxwa açewe'wewa'j ji'phmeeta', puii jxpakwena fxi'zewa'jsameeta' wejxwa ũusuh jxuka ewçxáa yaakxwa'ja's ji'phuwa'jsata' nasa jxukaysatx peeygãhna.

<sup>3</sup> Nyafxii' kwe'sxwa Dxusa's jiiimeeçxa' nwẽese'jsamée jxpubana naa kiwete ewmeesaçxá's pa'pçxuna puutx ewmeeçxáa yajkxna puutx yahçenaçxáa fxi'zesatha'w yu', seena' kazxsa. <sup>4</sup> Nawa kwe'sxtxi nwe'wesa Dxus peeygãani nasa jxukaysa jii vxyaaçxa', kwe'sxtxi nwe'wek. <sup>5</sup> Nawa kwe'sx kakweju ew yũuna fxi'zepa'ga txã'wẽ yũume', naasáa peeygãhçxa yuuçxáak txã'wẽ nwe'we kwe'sx ũuste pkaltxi yaatena. Txãa pa'gak Dxus Espiritu' kwe'sxtxi yu'pthehçxa kĩh pkal yuhwa ji'phmée kaafxi'ze'je'. <sup>6</sup> Nawa txã'wẽ nwe'wesa Jesukristopa'ga yuuçxáak Dxusa' txajx Espiritu's jxuka ũs kwe'sxtxi, <sup>7</sup> kxah Dxus dxi'pte yuwemeesa yuuna pa'jçxa pçumée itxi fxi'zewa'ja's jxpa'gakahnku txã'wẽ peeygãhçxa nwe'we.

<sup>8</sup> Na'wẽ pta'sxthu txã' isa yuja', txãa pa'ga idxa' txãatxi' kaayaki'jna nes myuu, kxah Dxusa's ũuste jxpa'gasa' ewçxáa yũuna fxi'zetxna. Txã'wẽ ew yũuna fxi'zenisa' wala seelpisa' jxukaysatx. <sup>9</sup> Nawa puutx we'weni

seelpimeesatxi's mpa'yajkx, txãniiteywe'sx kimçxah ne'ta yu' sa' kîhçxah ne'ta yuusáa yu' txãaçxáatx jiyu wēena fxi'zenitx, vxite' Moises leysu we'weçxa puutx puii wēenitx, vxite' puii jxpakwena fxi'zenitx. Txã'wēsa' kîhte yuhwa seelpimeesata'.

<sup>10</sup> I'kwe'sx pkhaakhenitewe'sx maaíia' isameesaçxá's kaapiya'jna kaypuba'jwa'jsa kasejewáana açá' txã'sa' pa'yaçxa myu'kxpeh e'z uspkaçx. Nawa e'z us we'wetewa nwēese'jmeete', pkhaakhenijū kutxi'jçxa peena yu' kaapa'ja'jnu. <sup>11</sup> Txã'wēme' nasa txã'wē yūusa' багаçxtewa pkalte yuuçxáa fxi'zewa'jsaçxa txã'wē yuuna.

*Tito's we'weni kîh yūuwa'ja'swa*

<sup>12</sup> Artemas meeçxa' Tíkiko txãawe'sxtxi iidx tasxna adx kajaçpkaçxha', idxa' dud yuweene'ga Nikopoliste adx yakh puutx uyya', nus en skhēwpkaçx kxtee ūsu'nja sūju'th. <sup>13</sup> Iidx ājani yu'sa' kîhtewa jxuka mpu'çx yuwee pu'çxsa Zenas vxite' Apolos txãawe'sx dxi'the pee-jini's, kxah kîhwa peejimée dxi'the u'jwetxna. <sup>14</sup> Açá' iidx txã'wē yūuni's uyçxa', kwe'sx yakhthē'jwe'sxwa selpiiya' piyaatxna ew yūuna peejinisu pu'çxya'.

*Pablo yuwe weçxaa kaahni*

<sup>15</sup> Adx yakh ūssa jxukaysa yuwe weçxaa kaja'tx. Açá' idxwa yuwe meen weçxa kwe'sx namikuwe'sx Dxus yakh jxpubamée fxi'zesatx. Dxusa' i'kwe'sx jxukaysatx pu'çxhina.

**Dyus Yuwe U'sesa**  
**Páez: Dyus Yuwe U'sesa New Testament**

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 21 Feb 2024 from source  
files dated 29 Jan 2022

06da09f4-8d0f-5001-ae8c-0e6aa0131ffd